



**Sumáriu Kazu**  
**Tribunál Distritál Baukau**  
**Janeiru 2022**

**Afirmasaun:** Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba kualkér violénsia hasoru feto.

**A. Sumáriu prosesu julgamentu kazu iha Tribunál Distritál Baukau**

**1. Totál kazu ne'ebé JSMP monitoriza: 16**

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b) (LKVD)	Ofensa ba integridade física simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime Violénsia Doméstika (VD) sira no artigu 36 kona-ba krime sira violénsia doméstika nian hanesan krime públiku)	3
Artigu 154 KP & artigu 2, 3, no 35 letra (a) LKVD	Maus-tratus ba kónjuje	3
Artigu 20 (1) Lei Arma Brankas	Arma brankas	1
Artigu 172 KP	Violasaun seksuál	1
Artigu 259 KP	Danu agravadu	1
Artigu 258 KP	Danu simples	2
Artigu 207 KP	Kondusaun sein karta	2
Artigu 171 KP	Koasaun seksuál	1
Artigu 145 KP & artigu 2, 3, no 35 letra (b)	Ofensa ba integridade física simples ho natureza VD no arma brankas	1

LKVD no Artigu 20 (1), artigu 2 (2 alinea f) Lei Arma Brankas		
Artigu 157 KP	Ameasa	1
<b>Totál</b>		<b>16</b>

**2. Totál desizaun ne'ebé JSMP monitoriza: 8**

Tipu desizaun	Artigu	Númeru
Pena multa	Artigu 67 KP	4
Omologa	Artigu 216 KPP	3
Suspensaun ba prizaun nia ezekusaun	Artigu 68 KP	1
<b>Totál</b>		<b>8</b>

**3. Totál kazu sira ne'ebé adia tuir JSMP nia monitorizasaun: 0**

**4. Totál kazu ne'ebé sei kontinua prosesu tuir JSMP nia monitorizasaun: 8**

**B. Deskrisaun sumáriu julgamentu ba desizaun kazu sira**

**1. Krime ofensa ba integridade fízika simples ho natureza violénsia doméstika**

Nú. Prosesu : 0009/21. BCVMS  
 Kompozisaun Tribunál : Singulár  
 Juis : Dr. José António d. Escorial  
 Prokuradór : Dr. João Marques  
 Defeza : Dr. Grigório Maria Lourdes de Lima  
 Desizaun : Pena multa US\$15.00

Iha 03 Janeiro 2022, Tribunál Distrital Baukau prezide julgamentu leitura sentensa ba krime ofensa ba integridade fízika simples ho natureza VD ne'ebé envolve arguidu SdS hasoru nia feen, iha Munisípiu Baukau.

**Akuzasaun Prokuradór**

Prokuradór akuza katak iha 04 Jullu 2021, iha oras tuku 15:00 lokraik, arguidu lori jerigen litru 5 ne'ebé bee iha hela laran hodi tuda lezada nia kotuk laran. Arguidu mós foti ai-maran baku dala ida iha lezada nia ain-kabun parte karuk. Antes agresaun ne'e, arguidu ho lezada diskute malu kona-ba arguidu taka odamatan ba lezada no halo lezada iha liur de'it, nune'e lezada ko'alia hasoru arguidu no mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

## **Produsaun ba prova sira**

Iha prosesu julgamentu, arguidu deklara katak iha momentu ne'ebá lezada tuur netik tiha iha odamatan halo arguidu atu liu la di'ak, nune'e arguidu hirus no taka tiha odamatan halo lezada iha liur. Tanba ne'e, sira diskute malu to'o arguidu halo duni agresaun hanesan iha akuzasaun. Arguidu hatutan katak sira forma familia iha tinan 2015, iha oan na'in rua, foin primeiravés halo agresaun hasoru lezada, depoisde arguidu fila husi sela polisia sira di'ak malu fali no to'o agora la baku ona lezada.

Alende ne'e, lezada kontinua konfirma faktu sira iha akuzasaun no konfirma mós ho arguidu nia deklarasaun katak sira di'ak malu ona no to'o agora arguidu la halo ona agresaun hasoru lezada.

## **Alegasaun finál**

Prokuradór haktuir katak mezmu sira di'ak malu ona no moris hamutuk nafatin hanesan feen-la'en, maibé atu halo prevensaun ba arguidu atu la hatoman-an uza violénsia hasoru lezada no oan sira iha futuro, husu ba tribunál atu aplika pena multa ba arguidu.

Enkuantu defeza haktuir katak arguidu konfesa faktu ne'ebé konstitui ba krime ne'e, di'ak malu ona, arrepende ninia hahalok, foin primeiravés halo agresaun hasoru lezada, nune'e husu ba tribunál fó pena ne'ebé adekuadu ba arguidu.

## **Desizaun**

Depoisde avalia faktu hotu, tribunál prova katak arguidu lori jerigen litru 5 ne'ebé bee iha hela laran no tuda lezada nia kotuk laran. Tribunál mós prova katak arguidu foti aimarán ida no baku dala ida iha lezada nian ain kabun parte karuk. Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$15.00 ne'ebé arguidu sei selu sentavus 0,50 kada loron, durante loron 30. Tribunál mós fiksa pena alternativa durante loron 20 prizaun, bainhira arguidu la kumpri pena multa refere.

## **2. Krime ofensa ba integridade física simples ho natureza violénsia doméstika**

Nú. Prosesu	: 0005/21. BCQLC
Kompozisaun Tribunál	: Singulár
Juis	: Dr. José António d. Escurial
Prokuradór	: Dr. João Marques
Defeza	: Dr. Grigório Maria Lourdes de Lima
Desizaun	: Pena multa US\$15.00

Iha 03 Janeiro 2022, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza VD ne'ebé envolve arguidu BCS hasoru nia feen, iha Munisípiu Baukau.

## **Akuzasaun Prokuradór**

Prokuradór akuza katak iha 05 Feveireiru 2021, iha oras tuku 20:00 kalan, arguidu basa dala rua iha lezada nia tilun-hun parte karuk halo lezada monu ba rai. Lezada hamrik fali no foti tudik hafoin arguidu baku kona lezada nia liman ne'ebé kaer hela tudik, nune'e tudik refere kona lezada nia ulun rezulta kanek. Antes agresaun ne'e, lezada prepara hotu hahan no ba toba ona, maibé aguidu fanu fali lezada atu han maibé lezada hatan katak kole hela. Arguidu la satisfas no hatan fali lezada katak ohin halo serbisu saida mak kole. Ho nune'e sira diskute malu no mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu, arguidu deklara katak faktu ne'ebé akuza ba arguidu ne'e loos hotu. Arguidu mós deklara katak depoisde akontese ne'e, sira di'ak malu kedas no arrepende ninia hahalok ne'e. Arguidu promete sei la baku tan lezada iha futuru. Arguidu hatutan katak sira forma família dezde tinan 2011, seidak iha oan, foin primeiravés baku lezada no nu'udar agrikultór rezultadu hodi sustenta de'it família.

Alende ne'e, lezada mós kontinua konfirma faktu hotu iha akuzasaun no deklara katak depoisde akontesimentu ne'e, família rua tuur hamutuk hodi rezolve problema ne'e tuir kultura no to'o agora arguidu la baku ona lezada.

### **Alegasaun finál**

Prokuradór haktuir katak arguidu provadu komete krime hasoru lezada no arguidu ninia agresaun ne'e prenze rekezitu sira husi artigu 145 KP, nune'e mezmú sira di'ak malu malu ona, maibé nafatin halo prevensaun atu arguidu la repete ninia hahalok hasoru kualkér membru família no ema seluk iha futuru. Tetu ba sirkunstánsia sira ne'e, husu ba tribunál atu kondena arguidu ho pena multa US\$60.00.

Entretantu, defeza haktuir katak arguidu konfesa faktu ne'ebé nia komete hasoru lezada hanesan iha akuzasaun, arrepende ninia hahalok, di'ak malu ona ho lezada no foin primeiravés mai hatan iha tribunál. Tanba ne'e, husu ba tribunál aplika pena ne'ebé adekua ba arguidu.

### **Desizaun**

Depoisde avalia faktu hotu, tribunál prova katak arguidu basa dala rua iha lezada nia tilun-hun parte karuk halo lezada monu ba rai. Tribunál mós prova katak lezada hamrik no foti tudik maibé arguidu baku kona lezada nia liman ne'ebé kaer hela tudik nune'e tudik refere kona lezada nia ulun rezulta kanek. Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$15.00 ne'ebé arguidu sei selu sentavus 0,50 kada lora durante lora 30. Bainhira arguidu la selu pena multa ne'e, arguidu sei kumpri lora 20 iha prizaun nu'udar pena alternativa.

### **3. Krime ofensa ba integridade fízika simples ho natureza violénsia doméstika no arma brankas**

Nú. Prosesu : 0030/20. VQVQQ  
Kompozisaun Tribunál : Koletivu  
Juis : Dra. Sribuana da Costa no Dra. Florencia Freitas no Dra. Jumiatty Maria Freitas  
Prokuradór : Dr. Julio da Silva Correia  
Defeza : Dr. António Fernandes  
Desizaun : Pena prizaun tinan 3 suspende ba tinan 3

Iha 27 Janeiru 2021, Tribunál Distritál Baukau liuhusi tribunál movel Iha Munisípiu Vikeke prezide julgamentu leitura akordaun ba krime ofensa ba integridade fízika simples ho natureza VD no arma brankas ne'ebé envolve arguidu PSP hasoru nia feen, iha Munisípiu Vikeke.

#### **Akuzasaun Prokuradór**

Prokuradór akuza katak iha 27 Novembru 2019, iha oras tuku 18:00 lokraik, arguidu foti katana taa iha lezada nia kanuruk parte kotuk rezulta kanek ki'ik. Arguidu mós lori liman tuku dala lima iha lezada nia ulun, tuku dala rua iha kotuk laran no tuku dala tolu iha lezada nia kabaas. Antes agresaun ne'e, lezada husu osan ba arguidu atu selu ema nia deve, ho nune'e sira diskute malu no mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD no Artigu 20 (1), artigu 2 (2 alinea f) Lei Arma Brankas.

#### **Produsaun ba prova sira**

Iha prosesu julgamentu, arguidu deklara katak iha akontesimentu ne'e arguidu toba hela no lezada mai ko'alia barak halo arguidu hakfodak no hadeer tiha, nune'e sira komesa diskute malu kona-ba osan US\$60.00 atu selu estatua tolu ne'ebé sira sosa atu tau iha kapela. Momentu diskute malu ne'e, lezada la'o tiha ba dapur no arguidu tuir lezada ba dapur no foti katana badak ida iha dapur laran no kaer katana nia ulun hodi tuku dala tolu iha lezada nia ulun parte kotuk la'os kanuruk. Alende ne'e, arguidu rekoñese uza liman tuku dala lima iha lezada nia ulun, tuku dala rua iha lezada kotuk laran no tuku dala tolu iha lezada nia kabaas. Arguidu mós deklara katak foin primeiravés mai hatan iha tribunál, arrepende ninia hahalok, fila husi sela polísia di'ak malu kedas ho lezada no to'o agora la baku ona lezada.

Enkuantu lezada deklara katak iha akontesimentu ne'e lezada fila hela kotuk, nune'e lezada la hatene arguidu uza katana taa ka tuku lezada la hatene. Alende ne'e, lezada deklara katak arguidu uza nia liman tuku dala lima iha lezada nia ulun, tuku dala rua iha kotuk laran no tuku dala tolu iha kabaas. Lezada konsege ba halo tratamentu iha ospital no simu ai-moruk no kanek iha lezada nia ulun la suku, maibé tau deit ai-moruk. Depoisde akontesimentu ne'e família sira tuur hamutuk rezolve ona problema ne'e no arguidu husu ona deskulpa ba lezada.

## **Alegasaun finál**

Prokuradór haktuir katak arguidu provadu komete krime iha konkursu tanba arguidu lori katana hodi komete krime arma brankas no halo agresaun hasoru lezada. Nune'e mezmu sira di'ak malu ona, maibé atu prevene arguidu repete tan ninia hahalok ne'e iha futuru, husu ba tribunál atu kondena arguidu ho pena únika tinan rua suspende ba tinan tolu.

Entretantu, defeza haktuir katak lezada hamrik fila kotuk la haree arguidu taa lezada nia ulun ho katana. Defeza nia intendementu katak arguidu kaer katana no ho katana nia ulun mak tuku lezada nia ulun, tanba lezada nia ulun médiku sira la suku nune'e kanek ki'ik no bubu ne'e la'os taa maibé katana nian ulun mak kona. Alende ne'e, tanba arguidu arrende ninia hahalok, di'ak malu ona ho lezada no foin primeiravés mai hatan iha tribunál, nune'e husu ba tribunál fó pena ne'ebé justu ba arguidu.

## **Desizaun**

Depoisde avalia faktu hotu, tribunál prova katak arguidu foti katana taa iha lezada nia kanuruk parte kotuk, tuku dala lima iha lezada nia ulun, tuku dala rua iha kotuk laran no tuku dala tolu iha lezada nia kabaas. Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrende ninia hahalok, primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ba krime ofensa integridade fizika simples ho pena prizaun fulan neen no krime arma brankas ho pena prizaun tinan tolu. Husi pena sira ne'e, tribunál halo komulasaun no kondena arguidu ho pena únika prizaun tinan tolu suspende ba tinan tolu.

### **4. Krime danu simples**

Nú. Prosesu	: 0033/17. VQVQQ
Kompozisaun Tribunál	: Singulár
Juis	: Dra. Sribuana da Costa
Prokuradór	: Dr. Ambrosio Rangel Freitas
Defeza	: Dr. Sidonio Maria sarmento
Desizaun	: Omologa dezisténsia keixa

Iha 24 Janeiro 2021, Tribunál Distrital Baukau liuhusi tribunál movel Iha Munisípiu Vikeke prezide julgamentu tentativa konsiliaun ba krime danu simples ne'ebé envolve arguidu Joanino S Pinto, Zacarias Sarmento, Cipriano Pinto, Januario S. Pinto, Atoy da Silva, Inocensio Ramos H, Marcelino Carlos P. F. Sarmento no Paulsencio Sarmento hasoru lezadu Afonso Pinto, Manuel Soares no Agostu Pinto, iha Postu Administrativu Vikeke Vila, Munisípiu Vikeke.

### **Akuzasaun Prokuradór**

Prokurador akuza katak iha 02 Novembru 2017, iha oras tuku 21:00 kalan, arguidu sira ba iha lezadu Agostu nia uma hodi estraga lezadu nia ai-kabelak tahan 20, piku didin kioske nian hamutuk tahan 10, janela ida, kalen tahan ida no motorizada ida. Depoisde estraga tiha lezadu Agostu ninia sasan, arguidu sira kontinua tuda lezadu Afonso nia uma hodi estraga janela haat no kalen tahan ida no tuda mós lezadu Manuel nia kalen

tahan sia. Konsekuensia husi arguidu sira nian hahalok ne'e ne'e hamosu prejuizu ba lezadu sira ho valor osan US\$1,000.00. Kazu ne'e akontese tanba antes ne'e sira iha problema kona-ba rai.

Prokurador akuza arguidu sira kontra artigu 258 KP kona-ba danu simples ho moldura penál to'o tinan 3 ka multa.

### **Produsaun ba prova sira**

Bazeia ba artigu 262 Kódigu Prosesu Penál (KPP) kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu sira no lezadu sira.

Iha prosesu tentativa konsiliaun ne'e, lezadu sira hakarak deziste sira ninia keixa hasoru arguidu sira, tanba arguidu sira fó ona osan ho valor US\$500.00 ba lezadu Agostu hodi selu fali sasan ne'ebé arguidu sira estraga. Enkuantu ba lezadu Afonso no lezadu Manuel arguidu sira fó fali osan ho valor US\$50.00 ba kada lezadu hodi selu fali sasan ne'ebé arguidu sira estraga ona. Alende ne'e, arguidu sira mós deklarata katak arrepende ona sira nia hahalok no promete sei la repete tan hahalok hanesan iha futuru.

### **Alegasaun finál**

Prokuradór no defeza apresia akordu dame ne'ebé parte rua decide ona no husu ba tribunál atu omologa prosesu ne'e.

### **Desizaun**

Bazeia ba akordu dame husi parte rua no pedidu dezisténsia husi lezadu sira, nune'e tribunál konklui prosesu ne'e no omologa akordu ne'e.

### **5. Krime danu simples**

Nú. Prosesu	: 0055/20. VQWTL
Kompozisaun Tribunál	: Singular
Juis	: Dra. Sribuana da Costa
Prokuradór	: Dr. Ambrosio Rangel Freitas
Defeza	: Dr. Antonio Fernandes
Desizaun	: Omologa dezisténsia keixa

Iha 24 Janeiro 2021, Tribunál Distrital Baukau liuhusi tribunál movel Iha Munisípiu Vikeke prezide julgamentu tentativa konsiliaun ba krime danu simples ne'ebé envolve arguidu Feliciano Freitas, Pedro Soares, Mateus Pinto, Celestino Aparicio, Fonciano Madeira no Marcos Amaral hasoru lezadu Luis Gusmao, iha Postu Administrativu Uatulari, Munisípiu Vikeke.

### **Akuzasaun Prokuradór**

Prokuradór akuza katak iha 15 Outubru 2020, arguidu Feliciano Soares halo lasu ba karau iha nia toos laran, tanba kalan-kalan karau sempre tama iha arguidu nia toos hodi han ai-farina no ai-horis seluk. Iha akontesimentu ne'e, lezadu nia karau vaka inan ida

mak kona arguidu nia lasu, nune'e arguidu uza diman tuda no kona iha karau nia kotuk laran hafoin karau halai no tali kotu nune'e arguidu la konsege oho karau refere. Tanba ne'e, arguidu bolu tan arguidu Pedro Soares, Celestino Aparicio, Marcos Amaral, Mateus Pinto no Fonciano Madeira, lori asu duni karau refere to'o iha Uatulari. Arguidu sira haree karau ne'e halai labele ona no latan hela iha rai, nune'e arguidu sira ko'a tiha karau ne'e no fahe nan karau ne'e ba malu, hafoin lezadu mós to'o iha fatin refere. Arguidu sira hamosu prezuiju ba lezadu ho valor osan US\$700.00.

Prokuradór akuza arguidu kontra artigu 258 KP kona-ba danu simples ho moldura penál too tinan 3 prizau ka multa.

### **Produsaun ba prova sira**

Bazeia ba artigu 262 Kódigu Prosesu Penál (KPP) kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu sira no lezadu.

Iha prosesu tentativa konsiliaun ne'e, lezadu hakarak deziste sira ninia keixa hasoru arguidu sira, tanba arguidu sira ho konsiensia rasik hakarak selu fali lezadu nia karau ho osan US\$500.00, nune'e lezadu mós aseita no simu osan refere.

### **Alegasaun finál**

Prokuradór no defeza apresia akordu dame ne'ebé parte rua decide ona no husu ba tribunál atu omologa prosesu ne'e.

### **Desizaun**

Bazeia ba akordu dame husi parte rua no pedidu dezisténsia husi lezadu. Nune'e tribunál konklui prosesu ne'e no omologa akordu ne'e.

## **6. Krime kondusaun sein karta**

Nú. Prosesu	: 0002/20. VQSTR
Kompozisaun Tribunál	: Singulár
Juis	: Dra. Florencia Freitas
Prokuradór	: Dr. Julio da Silva Correia
Defeza	: Dr. Antonio Fernandes
Desizaun	: Pena multa US\$45.00

Iha 24 Janeiru 2021, Tribunál Distrital Baukau liuhusi tribunál movel Iha Munisípiu Vikeke prezide julgamentu ba krime kondusaun sein karta ne'ebé envolve arguidu Carlos Rangel no Cesario Ximenes hasoru Estadu RDTL, iha Posto Administrativu Vikeke Vila, Munisípiu Vikeke.

### **Akuzasaun Prokuradór**

Prokurador akuza katak iha 21 Feveireu 2020, iha oras tuku 15:00 lokraik, arguidu Carlos Rangel kondus motorizada ho xapa matrikula G.2392 husi dirasaun Bahalarawain atu ba Vikeke Vila. Iha tempu hanesan, arguidu Cesario Ximenes mós



kondús motorizada ho xapa matrikula J.8081 TIs ne'ebé motorizada refere laiha lampu. Ho nune'e, bainhira to'o iha área Derok-oan, arguidu Cesario foti arguidu Carlos nia dalan no volante motor nian kaet arguidu Carlos nia motor halo motor rua soke malu. Arguidu na'in rua mós laiha karta kondusaun.

Prokuradór akuza arguidu sira kontra artigu 207 KP kona-ba kondusaun sein karta ho moldura penal to'o tinan 2 ka multa.

### **Produsaun ba prova sira**

Iha prosesu julgamentu arguidu Carlos Rangel no Cesario Ximenes konfesa faktu hotu iha akuzasaun no deklarata katak arrepende sira ninia hahalok. Arguidu sira mós deklarata katak antes ne'e iha tinan 2009, arguidu sira trata ona karta kondusaun no selu ona iha Banku maibé seidak bá foti karta kondusaun ne'e. Arguidu sira hatutan katak bainhira arguidu sira simu notifikasaun husi tribunál ba kazu ne'e mak arguidu sira aproveita foti sira nia karta kondusaun no agora iha ona karta kondusaun.

### **Alegasaun finál**

Prokuradór konsidera arguidu sira provadu komete krime kondusaun sein karta bazeia ba konfisaun arguidu sira nian, nune'e husu ba tribunál atu kondena arguidu sira ho pena prizaun tinan ida suspende ba tinan ida.

Enkuantu defeza haktuir katak arguidu sira konfesa, arrepende ona sira ninia hahalok no iha ona karta kondisaun, nune'e husu ba tribunál atu kondena arguidu sira ho pena multa.

### **Desizaun**

Depoisde avalia faktu hotu, tribunál prova katak arguidu Carlos Rangel kondús motorizada ho xapa matrikula G.2392 husi dirasaun Bahalarawain atu ba Vikeke Vila no iha tempu hanesan arguidu Cesario Ximenes kondús motorizada ho xafa matrikula J.8081 TIs ho kondisaun laiha lampu. Tribunál mós prova katak bainhira to'o iha área Derok-oan, arguidu Cesario foti arguidu Carlos nia dalan, tanba ne'e halo motor nia volante kaet arguidu Carlos nia motor nia volante nune'e rezulta motor rua soke malu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu sira konfesa faktu hotu iha akuzasaun, arrepende sira ninia hahalok, nune'e tribunál konklui prosesu ne'e no kondena arguidu sira ho pena multa US\$45.00 ne'ebé arguidu sira sei selu sentavus 0.50 kada loron durante loron 90. Tribunál mós fiksa pena alternativa durante loron 60 prizaun, bainhira arguidu sira la kumpri pena multa refere.

## **7. Krime kondusaun sein karta**

Nú. Prosesu	: 0015/20. VQSTR
Kompozisaun Tribunál	: Singulár
Juis	: Dra. Florencia Freitas
Prokuradór	: Dr. Julio da Silva Correia

Defeza : Dr. Antonio Fernandes  
Desizaun : Pena multa US\$45.00

Iha 28 Janeiro 2021, Tribunál Distrital Baukau liuhusi tribunal movel Iha Munisípiu Vikeke prezide julgamentu ba krime kondusaun sein karta ne'ebé envolve arguidu Matias E. Xavier hasoru Estadu RDTL, iha Postu Administrativu Vikeke Vila, Munisípiu Vikeke.

### **Akuzasaun Prokuradór**

Prokuradór akuza katak iha 19 Setembru 2020, iha oras tuku 02:00 madrugada, Megalino Gomes kondús motor marka Yamaha Jupiter MX ho xapa matrikula E.2568 TIs, husi dirasaun Wetalitula atu fila ba nia uma. Bainhira to'o iha área Kawa Uma hasoru arguidu ne'ebé kondús motor ho honda matrikula N.9945 TIs no arguidu foti tiha Megalino nia dalan. Ho nune'e, arguidu soke Megalino nia motor parte oin. Arguidu laiha karta kondusaun.

Prokurador akuza arguidu kontra artigu 207 KP kona-ba kondusaun sein karta ho moldura penál to'o tinan 2 ka multa.

### **Produsaun ba prova sira**

Iha prosesu julgamentu, arguidu konfesa faktu hotu iha akuzasaun no deklarata katak momentu ne'ebá ho kondisaun lanu la kontrola-an no motor ne'ebé arguidu uza ne'e la'os arguidu nian. Arguidu hatutan katak to'o agora arguidu seidak iha karta kondusaun tanba arguidu laiha motor. Arguidu mós deklarata arrepende ninia hahalok no primeiravés mai hatan iha tribunál.

### **Alegasaun finál**

Prokuradór konsidera arguidu provadu komete krime kondusaun sein karta, tanba ne'e husu ba tribunál aplika pena multa US\$50.00 ba arguidu.

Enkuantu defeza husu ba tribunál atu atu aplika pena justu ba arguidu ho konsiderasaun sira katak arguidu konfesa, arrepende ninia hahalok no foin primeiravés mai hatan iha tribunál.

### **Desizaun**

Depoizde avalia faktu hotu, tribunál prova katak arguidu kondús motorizada sein karta kondusaun. Bazeia ba faktu provadu ne'e no tetu mós sirkunstánsia atenuante sira hanesan arguidu konfesa, arrepende ninia hahalok, primeiravés mai hatan iha tribunál, nune'e tribunál konklui prosesu ne'e kondena arguidu ho pena multa US\$45.00 ne'ebé arguidu sei selu sentavus 0.50 kada lora durante lora 90. Bainhira arguidu la selu pena multa ne'e, arguidu sei kumpri durante lora 60 iha prizaun nu'udar pena alternativa.

## **8. Krime ameasa**

Nú. Prosesu : 0055/20. VQVQQ  
Kompozisaun Tribunál : Singulár  
Juis : Dra. Sribuana da Costa  
Prokuradór : Dr. Julio da Silva Correia  
Defeza : Dr. Antonio Fernandes  
Desizaun : Omologa dezisténsia keixa

Iha 28 Janeiro 2021, Tribunál Distrital Baukau liuhusi tribunál movel Iha Munisípiu Vikeke prezide julgamentu tentativa konsiliaisaun ba krime ameasa ne'ebé envolve arguidu EA hasoru nian feen, iha Munisípiu Vikeke.

### **Akuzasaun Prokuradór**

Prokurador akuza katak iha 25 Outubru 2020, iha oras tuku 13:00 meiodia, lezada haruka arguidu buka serbisu hodi sustenta nesiedade uma laran nian, maibé arguidu lakohi. Ho nune'e, sira diskute malu no arguidu dehan ba lezada atu foti katana tetak rahun tiha lezada nia ibun. Rona liafuan ameasa ne'e, lezada ta'uk no halai ba hela tiha iha lezada nia inan-aman nia uma.

Prokuradór akuza arguidu kontra artigu 157 KP kona-ba krime ameasa ho moldura penal to'o tinan 1 ka multa.

### **Produsaun ba prova sira**

Bazeia ba artigu 262 Kódigu Prosesu Penál (KPP) kona-ba tentativa ba konsiliaisaun, nune'e antes tama ba julgamentu produsaun ba prova, juis husu atu halo tentativa konsiliaisaun ba arguidu no lezada.

Iha prosesu tentativa konsiliaisaun ne'e, lezada hakarak deziste nia keixa hasoru arguidu tanba sira di'ak malu ona no husu ba arguidu atu la repete tan ninia hahalok ne'e iha futuru. Arguidu konkorda ho lezada nia pedidu ne'e no deklara mós katak arrepende ona ninia hahalok.

### **Alegasaun finál**

Prokuradór no defeza apresia akordu dame ne'ebé parte rua decide ona no husu ba tribunál atu omologa prosesu ne'e.

### **Desizaun**

Bazeia ba akordu dame husi parte rua no pedidu dezisténsia husi lezada, nune'e tribunál konklui prosesu ne'e no omologa akordu ne'e.

Atu hetan informasaun kompleitu, favór kontaktu:

Ana Paula Marçal  
Diretora Ezekutiva JSMP  
Diresaun e-mail: [ana@jsmp.tl](mailto:ana@jsmp.tl)  
Telefone: (+670) 33238883 | 77040735  
Website: <https://jsmp.tl>

